



Siunnersuut uunga: Pinngitsuuisinnaajunnaarnermik katsorsaasarneq pillugu Inatsisartut Inatsisaat nr. xx, xx.xxx 2018-imeersoq.

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

(Aappassaaneerneqarnera)

Siullermik Ilaqutariinnermut Peqqissutsimullu Ataatsimiititaliami ilaasortaqaatika qutsavigerusuppakka siunnersuut manna itisilerlugu suliarisinnaasimagatsigu. Una siunnersuut 2018-mi Ukiakkut ataatsimiinnermi siullermeerlugu, aappassaaneerlugu pingajussaaneerlugulu suliarisimasussaagaluarparput, ernummateqarsimaqaagulli aamma inatsisissatut siunnersuummut apeqqtissaqarsimaqaagut taamaattumik qujamasuppunga pisariaqartitagit pisimagatsigit siunnersuut ataatsimiititaliami sukumiisumik suliarisinnaanngorlugu.

Inatsisissatut siunnersuummi annermik pineqarpoq Allorfik aamma Allorfiup siunissami inuiaqatigiinni inissisimanissaa.

Allorfiup nittartagaa iserfigigaanni katsorsaanssamut neqeroorummi siullertut takusassaavoq imatut allassimasoq "Imigassamut, hashimut spillerajunnermulluunniit ajornartorsiuteqaruit *taava Allorfimmi katsorsartissinnaavutit*"

Aamma allassimavoq Allorfiup Katsorsaavik Nuuk suleqatigigaa, taanna ullumikkut kisiartaalluni katsorsaavittut namminersortut ingerlavoq.

Demokraatiniit kissaatigaarput nukiit sulluunniit atortariaqartut pinngitsuuisinnaajunnaarsimasunik katsorsaanermi. Inuiaqatigiinni eqiigasorpassuarnik ilaqarpugut, atunngisatsinnik uangut politikereit taakku sulinissaannut sinaakkutissat killilersorsimagatsigit. Politikikkut sulinermi kukkussutaasinnaasut annerpaat tamanna ilagaat.

Kommunit katsorsaanssamut suliniuteqarnerminni akulikitsuaqqamik itigartinneqartarput Allorfiup atuunna pissutigalugu aamma neqeroornerup kingulliup kingorna taassumanga ajungaasunik suleqateqarnissaminut.

Innuttaasut ikioqqupput maannamullu politikikkut suli isummerfigisimannngilarput aqut suna atorniarnelutigu illoqarfinni nunaqarfinnilu atornerluinerujussuup akiorniarnarani.

Paarlattuanik atorfilinnut aalajangigassanngortittarparput suna aqutigissanerlutigu. Uangut katsorsaaviutigut namminersortut akigalugit.

Iluvorsinnaava uangut nammineq nukittunersatta atorluarnissaannut pisariaqartinneqartunik sinaakkutinik pilersitsinnaanngitsugulluunniit allaat aamma matumani nammineq katsorsaasugut tatiginagit ilumut suliaq naammassisinnaagaat taamaattumillu akisussaaffik tigusimallutigu sapinngisamik



annerpaamik nakkutilleerusunnerput piinnarlugu? Ilagunuku naammattunik tatiginngikkigut akisussaataaqataanissaannut periarfississallugit?

Allorfik pilersinneqarpoq pingitsuisuinnaajunnaarnermut katsorsaavimmik pilersitserusunneq tunngavigalugu. Tassa imaappoq Allorfik atorneqartussaagaluarpoq akunnermiliuttut katsorsaavinni namminersortuni katsorsaariaatsinik assigiinngitsunik neqeroorutissatut sassaalliutigineqartut pineqartillugit.

Ullumikkut paarlattorluinnaanik pisoqarnikuuvoq. Allorfiup nittartagaani atuarneqarsinnaasutut taakku pingitsuisuinnaajunnaarsimasunut katsorsaanssaminnut neqerooruteqartarput tassa katsorsaaviit namminersortut atorluarneqarnerunissaat pillugu siusinnerusukku politikikkut aalajangersimaneq saneqqutiinnarlugu.

Ataatsimiititaliap siunnersuummik suliaqarnerani apeqquteqartarsimavugut paasiniallugu Allorfiup neqeroorutai taaneqarsinnaanersut innuttaasunut neqeroorutit amerlasuutut. Tassunga Naalakkersuisoq akilluni oqarpoq suut katsorsaariaatsit neqeroorutigisinnaanerannut apeqqutaasoq kikkut sulisorineqarnerat. Tamanna tupaallaatigaarput.

Taamaattumik apeqqutitsinnut malitseqartitsivugut tunngavilersueqqusilluta ilumut ataatsimiititaliap iluamik paasinnissimanersoq oqartoqarmat assigiinngitsunik katsorsaariaatsinik neqerooruteqartoqassappat taava pisariaqartoq Allorfik sulisoqartariaqartoq nutaanik katsorsaariaatsinik neqerooruteqarsinnaasunik taamaasillutillu katsorsaasunut allanut suleqatigiinnissamut isumaqatigiissuteqartariaqanngitsut.

Quianartumik aperisoqarsinnaavoq apeqqutigalugulu sutigut tamatigut nakkutilliinissaq politikereit pingitsoorsinnaajunnaarsimaneraat? Iperaanissaq ilinniartariaqalinngila? Uanga peqataarusussagaluarpunga takusinnaagakku inuiaqatigiinni piginnaanilippassuaqartoq kikkut tamaasa inissaqartillugit suliassamik kivitsisinnaasunik, kisermaassisunik ingerlatsisoqarniarsarineq alarlugu.

Ataatsimiititaliami ersarissumik nipparissumillu erseqqissarnikuuagut piviusunnortikkumasagut piumasagaatit assigiinngitsut Naalakkersuisup naatsorsuutigissappagu tapersersuinissarput. Ilaatigut qularnaarneqassaaq innuttaasut tunngaviatigut atorsinnaassagaat katsorsaanssamut neqeroorutit sulluunniit akuerisat imaluunniit ataqqineqartut aamma Kalaallit Nunaani katsorsaasut aamma taamaattumik Naalakkersuisoq qinnuigaarput § 5 imm. 3 ilusilersussagaa taasagut qularnaarneqartussanngorlugit. Taamaattumik tusarusuppara qanoq Naalakkersuisut isumaqarnerisut § -ip taassuma atorunnaarsinneqarnera iluaqutaassanersoq oqaaseqatigiinnik allannguinnissamut ataatsimiititaliap kissaateqaqqaarsimaneranut naleqqiullugu?

Kina oqarami katsorsaasut namminersortut illersorneqassasut § 5 imm. 3-p peerneqarneratigut, qularnaarsinnaanartigulu Allorfiup siunissami, soorlu arlalitsigut takoreeripput, itigartitsisarniartoq piumasagaatit § 13 imm. 3-mi allaaserineqartut namminneq isumartik naapertorlugu pitsaanerusumik naammassisinnaagamikkit.



Qularnaarusupparput siunissami kukkusumik ingerlalinnginnissarput, kissaatigaarpulli partiit qalipaataat apeqqutaatinnagu tamatta ataatsimoorluta inuiaqatigiinni ajornartorsiutitta ilaat annerpaat aaqqiivigissagigut aamma siunissami ikiunissamut pisariaqartinneqarluinnartumut periarfissanik amerlanerusunik ammaassinissarput qularnaarlugu.

Taamatut oqaaseqarluta siunnersuut Ilaqutariinnermut Peqqissutsimullu Ataatsimiititaliamut ingerlateqqipparput pingajussaaneerneqannginnerani suliareqqitassanngorlugu, siunertaralugu tamatta isumaqatigiissuteqarnissarput inuiaqatigiit eqqarsaatigalugit pilersikkumallugit sinaakkutit pitsaanerpaat ajornartorsiuterujussuaq pisarput perumallugu.